

Proseso hurídiko sivil mester por mihó

Wednesday, 21 November 2012 19:54



Willemstad - Durante su diskurso na okashon di 35 aña eksistensia di Órden di Abogado, Dekano mr Karel Frielink a elaborá riba e di 7 añanan Kódigo Sivil nobo i e prosedura hurídiko.

Na opinion di Frielink e proceso hurídiko sivil mester por mihó i den e kasos aki hopi mas mihó. Frielink a splika ku no mester pensa solamente den ki forma ta mihó pa apliká lei, pero na mes momentu ta bon pa pensa ku si huesnan i abogadonan ta funshoná optimal. Por pensa tambe kon por adaptá e sistema pa un mihó funshonamentu di manera ku por kontribuí na un mihó forma di ehekushon di derecho.

Na opinion di Frielink, tin e tendensia ku partidonan ta pèrdè for di bista ku e proceso hudisial sivil, ta e último meta pa haña desishon di un diskrepansia.

Netamente esnan ku ta buskando nan derecho via di proceso hudisial sivil, ta reklamá ku e prosedura sivil ta dura demasiado largu.

Esaki ta trese kuné ku un dado momentu no tin bista mas riba e kasos i e proceso ta kosta hopi plaka, miéntras ku durante henter e proceso largu aki, e resultado ta masha difísil pa antisipá.

E tipo di kehonan ku kasi tur abogado mester a yega di topa den nan karera, mester keda tumá na serio, Frielink ta opiná.

Kon bunita e Kódigo Sivil ta, tin aspektonan den esaki ku sin mas ta mester di mehoransa.

Un di e aspektonan ku Frielink a elaborá riba dje, ta e aspekto di yega na e bèrdat.

Finalmente Frielink a trese dilanti ku apesar ku e no ta partidario di un sistema merikano esta pa un “pre-trial”, pero tòg e dekano ta di opinion ku ta na su lugá pa kuminsá pensa riba un mihó forma pa e prosedura tuma lugá i pa yega na e bèrdat.

http://www.hustisia.com/index.php?option=com_content&view=article&id=1459:proseso-huridiko-sivil-mester-por-miho&catid=41:general&Itemid=71